

THE CHINESE-JAPANESE LIBRARY
OF THE HARVARD-YENCHING INSTITUTE
AT HARVARD UNIVERSITY

2

JUN 18 1956

T 5414/83

何大復先生集卷之三

五世

姪孫源洙字魯存

六世姪孫維基字培菴

同校

七世姪孫輝少字誦芬

男八世姪孫永謙字遜齋 重梓

辭一十篇

灋有蘭辭

灋有蘭兮獨榮滋被覆沙汀兮含歲蕤寒芳兮采綠
臨江兮暮思靈均兮弗覘心愴惻兮目眊眊蹇獨立
兮寡類嗟懷忠兮守艱理楫兮蕩舟空山兮水潺湲

九詠



紫貝宮兮瑤堂結蕙幄兮蓀牀班文豹兮兩階龍宛
宛兮翼梁設姐兮陳玉桂樽兮湛綠清灑掃兮愉穆
望靈車兮冀髣髴靈之來兮開九京欽百神兮紛往
迎忽升堂兮降席爛霏霏兮滿盈被靈服兮委委華
英英兮容裔弁列星兮嵯峨纓曲虹兮猗靡座既奠
兮安歌衆倡作兮音繁和紅顏臻兮交代舞傳芬芭
兮揚纖羅拊鳴鼓兮循玉瑟樂齊會兮衍淫泆歎眇
眇兮覲以密靈之娛兮不終日靈之車兮倚桂旗駕
玉駟兮駮文螭御飄風兮乘輕霞返層霄兮超九達

來不語兮去無為目睠睠兮令予思予遊兮北渚往
媵兮帝女水衝波兮潺湲木瀟瀟兮葉下折蘭蕤兮
將若華杳冥冥兮空望予予朝兮北遊夕邁駕兮冀
州覽文昌兮朝東皇冰霰凜兮不可留朔飈振兮玄
雲黜顧窮原兮增百憂肆改轍兮西逝遵少皞兮故
域素陰肅兮裂肌灑凝凝兮罔極積霜周兮如陸靈
之處兮安測晞溫暾兮扶桑訊靈居兮陽阿六鰲兮
載山冲天兮高駝蔽日兮濤來下徒翹首兮奈汝何
訪靈遊兮南麓悵赤華兮不燭有獸兮黑斷有虺兮

九後集 卷之三
綬腹瞰朱海兮炎霧濁胡軒駟兮不我復嗟四方之
與上下吾又安知其所尋疑神鑑之莫邇豈予心之
靡忱羞蕙肴以罔薦蓄潔粢而孰欽睇孔鸞之翠蓋
像蒼虬之玉音下土幽暗而嶮巖兮需光澤之照臨
雨頌并序
歲戊辰五月不雨至六月土脉龜坼井汲不給禾則
半偃民實憂作動而轉徙者擾不可禁矣是月己亥
雨庚寅復雨人於是乃有秋望稍定逋志予既為憂
旱賦矣茲則喜而有頌焉曰

右皇惠鮮終悔其傷天覆之彌雨之洋洋有燁其電
有震其雷何燁何震載濟其施甫田之坼陰液膏之
爰高爰亢腴之饒之濯濯黃流周原廣隰膏之陰之
土絡斯釋卉則烝矣樹則升矣彼禾之苗勃其興矣
從橫其委維秀驕驕維實繁繁有獸般般亦斑其皮
鳥集于林載澤其儀相彼物矣既鞠既靡自我天作
乃奮而起嘉穀之有萬福是來猗予民哉侯不綏哉

甘露頌

皇嗣元載仲月維冬茂彼陵木甘露以降溫風來臻

柔惠周渥湛湛灑灑既塗既溥如葩斯敷如實斯搏
精華內融純白有爛寔維和鍾昭我皇穀彬彬庶徵
厥來多福昊天棐忱冥冥罔常於皇克德受此嘉祥

告咎文

露雲暗藹彌玄穹兮皇鸞儻回鷓厲矦兮鬱氣忍澳
迅颺風兮澤渥頑滯不下降兮七曜弗列五緯汨兮
北斗亂精貫日月兮白彗出地芒四發兮陰陽離職
互驕越兮奔震墜露輾長林兮鳥慄獸亡鯨鰲峯兮
雨雪千里電交侵兮川陸不分水溺淫兮嗚呼后皇

兮慙不我哀蒞下土兮播害苗我蠢兮寡辜昧茲咎
兮曷來升九閭以陳詞兮仰憑翼而訊之予使列缺
以啓途兮擾白螭以服輓乘玄冥以丞行兮乃覲帝
于太微既予忱以跽進兮告弗祥于帝側含萬物以
化光兮胡格和于九域敷乾始之美利兮運不息之
元德飭望舒以馳範兮戒羲和以正御禁雨工之濫
施兮屏雷師之妄驚俾星弗易次兮天弗改度外紫
宮兮內鈎陳申耀魄兮理鴻鈞御群靈兮秉萬神分
列耀兮朝北辰又使北斗以振紀兮命輔星以佐之

定二儀之元本兮操七政之樞機中四方以臨制兮
均五行而建四時視九遠之蕩蕩兮履三階之平平
駕天廐之玄駟兮啟璿璣與玉衡樹蚩尤以為旗兮
檻彗星以為旌驅虹電以前導兮叱攬搶使先征太
白隱隱以晝斂兮熒惑退而守明上下既奠位兮日
月攸行麒麟遊于四野兮虺蛇潛以屏藏鴟鴞鷄
不敢鳴兮鳳凰昭其文章孽誕弭息兮永昇綏康終
予言以告旋兮俯茫茫以容與天黝黝以沈寥兮雲
冉冉而忽雨予爇赤華以照地兮令燭龍以耀宇回

軒車以長辭兮風颯颯而愁予

七述 并序

枚乘作七發曹子建作七啟張景陽作七命皆通為
擬襲予病居客有述遊觀之盛以啟予者凡七事乃
作七述

胎簪子為舍人病弗能朝謁脫籍納組買車以還還
而謝姻戚杜慶弔却除塗戶塊焉以居客有冠危冠
服濶領綦履佩玦造門辭曰竊聞子病謝客客願有
以見也胎簪子謝弗見者三客曰竊聞子病謝客客

有說于子願有以見也於是胎簪子乃敷文純之席
布瑤華之几啟扉以入下榻以俟客望見曰子何病
之深也吾相子之病非有窒于腸胃結于腠理瘀于
血氣而痼于骨髓者也若有伏憂綿綿纏纏糾纏于
心惟思所起子何病之深也夫腸胃血氣之病可以
湯浣醴灑腠理骨髓之病可以鏡石灸熨皆宜獨攝
靜息不可勤擾而子之病病于憂也獨則愈生靜則
愈積絲分縷起將不可止非有效于湯浣醴灑鏡石
灸熨也顧乃堅戶謝客斂聰寐視吾見子之病日甚

也吾聞目不蔽則神暢耳不塞則志廣體不局則氣
伸吾將述遊觀之盛以語子使子目決于視以暢其
神耳快于聽以廣其志體快于動以伸其氣而子病
去矣胎簪子曰辱客枉造請試言之敢敬服聽

客曰神都天府之國四通五達之關繚以濬塹表以
周原乃有玄居造天崇基冠山周欄連樓曲屋層軒
升高入奧莫知其端飛甍接題交疏迴欄上通中甯
下旋井幹俯觀次鱗仰接飛翰盤紆焉綸網焉翼翼
焉班班焉邈不知其所攀也而又環以百里之危垣

延以千步之脩廊炫以瑱璧丹楹植以鈿砌雕墻錯
以綸綺雜施玄黃揭層虛而照八埏迷五緯而眩三
光中有玄室煜朱陽兮夏屋寥寥含淒霜兮阿閣崔
巍雕沉香兮櫟題逶迤刺沙棠兮輕杉為祝文杏梁
兮鳳鶯隱起蛟龍驤兮乃御飛櫺升廣堂兮若是者
可謂宮室之盛者也吾與子往遊可乎胎簪子曰吾
聞瓊宮瑤臺夏以焚臨春結綺陳以亡彼萬乘之主
猶不可也而吾處草野編蓬戶以為安者奚事此遊
也

客曰乃有上都貴人戚里公子迎晨而出及暮乃止
入饌八珍出布千駟車馬雜沓絡如流水爾其襲白
縠服文裘陋黑貂而不御輕狐白之莫儔燦三英以
外飾誠五紵之可羞躡飛雲之履被明霞之紉水蠶
瑩膚藻龍耀眸綴以錦帶懸以吳鈎斷犀削象斬蛟
割虬輾轆流光芙蓉照秋文玉銜英不足比步光懸
璃莫為酬於是驟騰駕憑華輶施通幃秉脩矛搴葳
蕤之飛蓋張連蜷之翠旂蔽羽旂於日表布絲帳於
道周馬則驊騮赤驥紫燕青驪漉漉師師駢駢駢駢

踴躍騰驤礪魄權奇雲駿霧鬣電駛煙馳控以寶鉸
纏以金羈銀鞍燿爚繡軛生輝乃出黃金擲白璧家
多匿亡門有食客意氣傾人風聲下敵雖秦楚之豪
束手而莫抗而燕趙之英不敢比肩而與匹也若是
者可謂服食輿馬之盛者也吾與子往遊可乎胎簪
子曰彼皆崇權貴任豪俠危上以弱下厚積而過享
者也吾布衣藜藿之士奚事此遊也

客曰三五冶容二八曼姬容華眇好豔多姿兩輔善
笑承重頤臙頸豐肉宜細肌長眉連娟曲中規搨腰

擢步隨風移左右盼睐目波施窈窕善戲體迅飛爾
乃結脩鬢之嗟峩襲芳澤之烈薰珥明月之步搖服
素霓之繽紛垂羅掩縠攢簪合茵明滅纖霧綽約繁
雲於是進舞席御歌宮奏大呂扣黃鐘噉鼓搖虞按
瑟搗鏞笙竽共逐金石和同衆音繁會殷於層空既
而停衆樂拂雲和出嫚舞流纖歌歌曰長裙單衫曳
鳴璜吳娃雙歌出洞房不惜緩步升君堂華燈錯分
夜未央於是醉酣雜坐弛帶舒纓投贈詩賦顛倒壘
巖衆客出坐蘭膏不明美人侍傷逸態橫生乃歌曰

蘭膏滅兮夜已深絳霄微兮白河沉鳴琯促柱兮感
君心知音識節兮君幸臨夫聲伎之妙宜無出此子
將從遊其間乎胎簪子曰吾聞五音令人耳聾五色
令人目瞽非子所願遊也

容曰平原廣野彌望千里馬可陳列車得駢軌於是
遊徒發乘盛張旗幟淬刃礪鋒弦弓鏃矢輿卒駿奔
獵師起喜乃其布網周山列罟彌澤蹂塵障天舉燎
燔薄絕流赭崖剔林搜壑逸材之獸健舉之翼莫不
縱橫矚藉揮突放逸聞弦自墮惟羅立殛灑毛委羽

駭膽慄魄孰能抗巧何以肆力哉由是張罟則盡獲
繳矢則疊加仰貫雙鳧俯連五爬魚不遺筌兔茂虛
且爾乃什麒麟下孔鸞翳翡翠躡狔豕掩雲鴻繫文
驪折錦脅鍛繡翰玄熊綠羆青兕黑犖鹿麝豹麋
羊狡貌滌血頰輪積如堆埒然後臨清池玩流水墜
絲竿繫文鯉披鱗斫髻溶溶裔裔犒徒會侶畢景斯
已是較獵之盛也子將從遊乎胎簪子曰吾聞騁田
獵令人志荒非所願遊也

客曰天皇之庭廣莫之墟有山焉其山卑五嶽小三

赤華爍灼白日移貝宮參差開九閨辛夷為梁桂為
楣寶幡綴角羽帳垂栴蘭奮逸霧出幃夜宿姹女棲
靈妃被服翠茗拾青籬出騰八極駮兩儀上下日月
驅風雷千秋萬歲安有期於是彌駕層顛飛鳥絕嶠
白雲含輝皓雪奪耀仰攀桂樹載歌以嘯俯瞰濁世
奚異蟲鳥歌曰桂樹兮交加綠滋兮丹葩仰攀兮嘯
歌俯人世兮奈爾何是則神仙方外之盛也吾與子
遊焉胎箬子曰疾迫隘慕遠遊吾所願也然荒茫而
不可徵未暇為也

客曰有應世之大人秉持仁義服被禮樂其德溫溫
與與其象熙熙噩噩量出海宇志棲寥廓懷先世之
憂抱終身之樂不結駟而貴不萬鍾而豐不戈甲而
威不勲級而功布絮所不能賤糟糠所不能窮非戮
辱之可詘非斗斛之可容於是陳詩書以為圖發圖
史以為廬樹節讓為旌旄饌道德為膏腴入皇義超
虞唐拚五霸彰三王塞者通潛者揚隱者發晦者光
軫轆風雲經緯陰陽繪若黼黻擘如琳瑯出則施聲
教歛遐荒臻盛美流休祥處則韞匱深藏韜曜含光

水後集 卷之三
視葛天為並世招箕穎而同行是則何如胎簪子灑
然陽氣見於面病若脫而瘳者於是延客上坐設帳
具饌曰果有是人吾將從遊

伯川詞 并序

伯川者周太伯之所遺也水部錢君家于川上世敦
讓節至水部益脩文義有紹芳烈將俟宦成歸于伯
川之上命予作辭歌以樂志

錫山之下兮伯之河水鱗鱗兮石莪莪子之室兮水
阿結綠蘅兮葺荷白蘋兮青莎何以繚之兮素沙子

朝出遊兮暮來歌子不樂兮復如何若有人兮河之
湄施蕙帶兮服芟衣循洲陲兮下水裔目眇眇兮獨
懷思若華兮蘭蕤折之兮遺誰霜露兮夕下恐芳菲
兮我萎歲暮兮無聊佳人兮來歸川之上兮太伯所
居我迎伯兮河之隅羞蕙肴兮薦文魚伯之來兮駕
柏輿芬霏霏兮爛襲予我思伯兮世靡渝

霍山辭 并序

司農公致為臣而去或曰司農公致為臣必不豫懷
忠獲疑脩正被斥此屈子所以憂離感憤而賈生所

以悼毀也或曰否不然枉直善惡厥道不同君子要
之善且直而已不論夫合不合也故忠臣不責信於
君正士不責親于人司農公致為臣胡為弗豫間日
汝南何景明往造公視其體腴然其度于于然不異
平居也徐察其色黝然顧若有伏憂者於是景明述
或人之言告之公曰夫臣者以誠奉職以道愛君不
克其職則耻不得其道則止今予思克厥職而道不
得以罪遣足矣然疇昔之夕予靡靡寐起游思纒纒
有揆皇度或省而反予者胡為豫胡為弗豫或人知

予哉景明循階將退公曰行止進退命也豫不豫人
也人如命何予晉產也晉之鄙有山焉曰霍山霍山
者晉鄙之鎮也其下沃渠衍拓可田而食豐樹樹樹
可蔭而息而剷窪躋阿可以構而處也吾逝矣安知
人間有豫不豫也景明乃為霍山之辭歌以壽公辭
曰巖巖霍山之窿穹兮莫彼晉楚左屬太行蒲坂委
蛇兮襄陵蟲鬼而在下雲之興兮霈霈望佳人兮容
與嫋嫋兮秋風芳卉兮已摧虎豹兮咆哮猿嘯兮又
哀山中兮窈窕佳人兮胡不來桂樹生兮何檀檀霜

霰下兮夕以寒叢薄兮蒙密澆穴兮潺湲鳥萃兮翼
翼獸伏兮般般鳴隼不可以共厲兮佳人歸來兮延
年

榮養堂歌

翼翼茲構兮實顯敞蘭栴櫺兮弗卑以抗周墉廣
除兮廊四嚮母氏爰居兮安居服養菊徑兮蕙圃有
曄其萱兮羅生于下洛京逶迤兮嵩邛幽阻湯湯伊
瀍兮泛泛陽渚朝升矚兮暮斯止母不樂兮母何以
紛酒觴兮吹歌羞豐膳兮有加被霞襦兮簪瓊華母

氏樂兮樂且遐

滕王閣歌

朱甍兮參差綺構兮崔嵬俯眺兮層城仰登兮高臺
登高臺兮以臨江渚水浩浩兮在下忽雨兮西山有
澣兮南浦畫舸兮迷津繁吹兮萬戶出千里兮名衢
山川麗兮洪都置酒歌兮張燕會儼車服兮盛文儒
俗恬兮政暇君胡為兮弗傲以娛君遨娛兮閣中撫
迴檻兮披崇墉携賓客兮舉目弔帝子兮夕江江何
有兮有蘭交加攬紅蕤兮擷瑤華泛長空兮秋水送

孤鴻兮落霞逝從君兮靡由眇愁予兮奈何

何大復先生集卷之四

五世

姪孫源

字

曾石

同校訂

六世

姪孫維基

字

培菴

同校訂

七世

姪孫輝

少

字

誦芬

男

八世姪孫永謙

字

遜齋

重梓

古詩六首

皇告

皇告頌開

詔也歲乙丑中夏

皇帝告萬國朕

祇命

上帝乃御至極其與民更始改元曰正德

爾萬方欽哉其宣播無匿

八月至貴其日載暘龍旂既翔龍幄既張大小肅肅

乃於郊迎既召有衆播告在庭皇皇恤命罔不是將
嗟我貴庶荼苦孰蠲既加斧斨屢罹凶年眷茲皇仁
如天如春如草斯植莫不敷宣

蠢蠢苗民浩浩炎邊是俾是承亦共戴天黑齒髮

椎執弩被氈載歌且謠皇帝萬年

皇告三章二章章八句一章十句

澌之水

羅生之辭子歸澌江也予作澌之水三章

澌之水可以方可以舟子之歸矣可以斯游

澌之水可以河可以海子之歸矣可以斯邁
澌水有岸白石有爛斯邁斯遊樂也永嘆

澌之水三章二章章五句一章四句

中林之棘

中林之棘送崔子也

中林之棘維桃與李阪田之特生也曷以民之無儔
曷其有已

王事皇皇駕言徂行念子出宿我居玃玃我心之邁
與子同征

行野蹶蹶行國邁邁無草不茂無穀不潰民之瘁矣
心憂用喟

彼魚之罟在彼河梁彼兔之罝在彼河側豈不是思
進退維亟

同賈知貪同食知甘子諒子懷如口弗爽予之有懷
子豈不諒

火之方殷不戒胥燔水之方割不戒胥溺火之方殷
乃仇撲滅水之方割棄其舟楫

有滄斯雨有霰斯雪如履堅冰乃尚思熱衆方媚矣

莫敢獨說如處大厦俟其顛覆

謂人弗言言成禍矣謂人弗職職成過矣孰無朋友
倡誰和矣

子曰弗仕子有父母子曰弗仕兄弟誼予 天子則
不罪朋友弗取

中林之棘九章七章章六句二章章八句

原有楚

原有楚贈韓子也

原有楚隰有苦子車駟牡駕言徂矣見子之父

原有柶隰有蓼子車駟駟駕言遊矣見子之母
原有桑隰有唐子車駟黃駕言行矣見子之兄
子涉渭矣渭水泚泚我思見子安得北流
子涉渭矣渭水泚泚我思見子安得北逝

原有楚五章三章章五句二章章四句

淮水

淮水送張子也

淮水湯湯伐鼓鏜鏜之子南行征夫不遑

有翩者燕集於堂巢我日不謁而旬不朝征夫况瘁

誰使告爾勞

誰經營四方誰高門翱翔誰粲粲衣裳誰饑渴載行
辰月弗震乾月維霄視天之威伊胡云虐弗問則退
問言誰對

敬我友矣式相求矣詢於道周維教言是由母瑣言
是謀母戲言是流

桓桓之羆兔罹于羅如彼弋鳥維恐不加無執猶狸
而舍彼虎豺

我視人之疚如裁我躬勿曰行弗動勿曰言弗用勿

曰我寡憚彼有衆

矢時弗頌維云諷矣伊誰之送孝友張仲

淮水八章三章章四句五章章六句

秋風

秋風諷也

秋風厲厲中園有卉不植松與檜奈彼蕭艾

秋風飄飄中園有條不植松與橋奈彼艾蕭

秋風二章章四句

何大復先生集卷之四

何大復先生集卷之五

五世姪孫源洙字魯存同校訂

六世姪孫維基字培菴
七世姪孫輝少字誦芬
男八世姪孫永謙字遜齋 重梓

樂府雜調四十二首

興隆祀丁曲

籥朱竿揚朱絃鳴鐘朗鼓各在懸月建酉日次丁牲

全醴成告于庭一解以哉斯道淪以失天啟神聖我祖

出用夏變夷四海一遐土之人炳文質二解昔者子欲

居九夷百世之下乃享于茲猗與斯道垂憲靡遺三解

浩浩皇皇八荒九州罔或靡知罔或靡由曷知曷由
我祖之休四解

羅女曲

羅女年十五自矜好顏色山葉雜山花插髻當首飾
蠻方立門戶男女多生涯昨聞城中市女出男在家
上市買黃絲染緝作花布裙短衫袖長不惜雙腳露
夜行山中道何處吹蘆笙我歌連臂曲曲罷動郎情
動郎情與郎匹生女復長男三年始同室

落葉哀蟬曲

落葉哀蟬曲者漢武帝之所作也李夫人早天帝
思之不已為作此曲也

寂寥兮寒閨空帷兮晝低若有人兮感羅衣魂恍惚
兮往復來涼風飄颻兮吹玉階秋葉颯兮鳴蟬哀有
鳥嗟嗟永離乖雙棲比翼兮何時諧

剡溪歌

溪之水兮幽幽誰與子兮同舟舟行暮入山陰道月
濛濛兮雪皜皜千載重尋戴逵宅溪堂無人夜歸早
乘興而來興盡休君不見王子猷

悼遠辭

并序

侍御顧君祖存元先生生哲弗祿死夭弗塋侍御
君追念後先言嘅淚下景明君同年友也哀其意
作悼遠辭曰

矯矯龍蛇兮沒於泥沙嗟苦先生兮獨罹此嗟連彼
脩路兮驥驟不力美璞弗器兮良田不食嗟苦先生
兮獨罹此極

倚柱操

并序

倚柱操者魯漆室女之所作也漆室女倚柱悲吟

鄰人問曰欲嫁之女曰吾憂國傷人心悲而嘯豈
欲嫁哉遂自經而死予哀其志援琴而托其聲焉
鬼則有置兮鳥則有羅國無人兮將奈何心之憂兮
豈曰予未有室家嗟嗟室家非我營兮我生曷榮兮

戰城南

戰城南戰不息朝戰城南暮哭城北積尸纍纍肉腐
鳥不食放馬澤中雪沒馬腓沙寒草枯不得馬肥北
風夜吹胡兵四圍我欲上馬馬瘦不馳我欲射箭弓
硬不開但語城中親汝出收我骸戰城南君莫悲猛

九律集 卷之五 三
虎噬人翔於山垂欲食虎肉不避虎威男兒立功橫
行四夷生當封公侯死當白骨歸

巫山高

巫山高極青冥間翠綰參差十二鬟神女仙裙佩纓
動行雲飛入荆王夢含情流盼輕煙中玉床瑤枕薦
君宮紫羅白縠垂香風恍惚魂散莫與同微霜銷落
高丘樹哀猿孤吟鳥雙去荒淫淪滅竟何為暮雨冥
冥歸古祠

芳樹

芳樹離離朱華而綠滋華滋雖云好秋風暮來吹秋
風不足卹華滋亦有時嗟汝枝上鳥汝去將安歸美
人何方至貽我江上華秀彩奪人目胡為在天涯天
涯雖榮好不如常在家

關山月

關山月夜照青海頭白骨征人怨紅顏少婦愁少婦
含嚔望月來月明流影洞房開歲暮機中縑素出夜
寒燈下剪刀催年年搗衣明月秋明月還隨隴水流
閨裏空教看破鏡沙場不見大刀頭

琳池歌

琳池歌者漢昭帝之所作也

木蘭為楫文梓為船青荷為蓋衣紅蓮宮娃側坐揮
繁絃淒風嫋嫋飄素秋飛花委葉承波流霜露夜下
不可留

招商歌

招商歌者靈帝之所作也

高館聞兮曲池通乘舟夜逐荷葉東持荷作蓋不障
風持荷作衣難為縫金瑋玉鳧響秋空歌婉聲長待

夜終

公無渡河

公無渡河河濁不見日汝今欲往何時出公無渡河
河廣浩無涯往而不返化為泥與沙夸父渴走成鄧
林至今丘塚猶岑崆河中蛟龍見人喜縱有舟楫誰
救爾噫嗟嗟公無渡河渡河而亡不如陸死噫嗟嗟
公無渡河

明妃引

明妃絕色世無鄰粉黛那數三千人咫尺宮門接前

殿君王只向圖中見當時自恃如花容美醜誰知由
畫工單于日近漢日遠萬里風沙魂不返琵琶馬上
再三彈翠袖朝啼關塞寒皓齒明眸葬胡地千秋遺
曲猶悲酸燕支暮雲白浩浩胡兒吹笳雪飛早山前
孤塚高嵯峩歲歲春風長青草古來抱節本難遇况
復蛾眉人所妬君不見長門宮不用黃金買詞賦縱
有朱顏君不顧

短歌行

冉冉秋序肅肅霜露蓄我旨酒名我親故鳥歡同林

水歡同源矧我同鄉胡能弗敦耀靈西藏明燈在室
更長夜良可以繼日園有藝菊庭有樹蘭秋芳是悅
春榮曷觀高陵可升海水可測出門異路安知南北
生年幾何去者日多子不我樂聽我短歌

銅雀妓

墓田望不極松柏夕離離存生有歡怨亡沒詎同思
井幹日已摧總帷寧復施衰榮互相謝身後徒爾為

苦寒行三首

天地黯閉寒冰霜皓崔嵬寂寥高城側鬱律見古臺

烈風夜中起飛雪千里來鳥羽沉不施獸口噤不開
虎豹斂穴窟蛟龍俱凍埋六龍銜白日寒苦光不迴
二
石裂南山下水結中河流莽莽北郭外死骨聚如丘
貧士被毛褐寡婦無完裯寧知貴公子絲竹宴朱樓
方辭白羽扇更御青羔裘

三

天風日夕厲海水不揚波飛雪被千里層冰白峩峩
嗟汝窮閭人無衣當奈何錦裘長安兒白馬鳴玉珂

象弧插彫韞射獸西山阿

塘上行

蒲生寒塘流日與浮萍儔風波搖其根飄轉似客遊
客遊在萬里日夕望故州鷓鴣鳴歲暮蟪蛄知凜秋
暑退厭絺綌寒至思重裘佳人不與處圓魄忽四周
房櫳淒鳴玉紈素誰為收白雲如車蓋冉冉東北浮
安得雲中鴈尺帛寄離愁

放歌行

天命諒靡易富貴安足陳自昔慕豪勝重義還輕身

大雅集 卷之五 七
整轡逾鞏洛驅車入咸秦立觀青雲上馳步要路津
射策報明主投書干大臣身為五侯客家與七貴隣
杯酒縱經過冠蓋羅逡巡顧盼生光彩吹噓借陽春
各矜意氣好自比骨肉親時事多變異交道亦湮淪
要盟等金石棄擲同灰塵赤心不足恃白頭更如新
歸來嗜藜藿偃仰隨松筠始知葵槿甘不若蘭桂辛
願從白屋士請謝玉堂賓

鴈門太守行

壘壘高山莽莽代谷城邊風起沙漠漠城內惟聞秦

胡樂太守下車買牛息戈陶民禮義朝絃暮歌北歷
黃沙磧南遊白草原五馬何秩秩朱英導文軒嗟哉
太守亦孔武時時較獵西山下

梁甫吟

君不見泰山高高梁甫在其半古來封壇禪地無宮
館崖崩壁圻鐵鎖斷秦碑漢碣何人看自從生人開
九州九十六帝行權謀虎豹啖食龍蛇憂朝翻暮覆
作雲雨立談坐笑生戈矛鬼神來往仙不死塵埃萬
變扶桑流君不見田疆論功爭二桃齊門三丘埋野

蒿又不見魯連辭賞輕千金却秦救趙何雄豪眼前
 無人辨曲直身後聲名更何益拂袖空憐蹈海心護
 車枉負排山力梁生五噫歌莫哀東絕梁甫觀蓬萊
 千年雲開錦繡壁五色日抱金銀臺瀛洲方丈列仙
 占文成五利何能驗徐生入島竟不回博士儒生盡
 坑塹我吟梁甫君振衣世路崎嶇多是非琅玕芝草
 海岱曲釣竿拄杖從今歸

採蓮曲三首

青荷晝舒白露晞朱光照耀含素蕤綠房翠蓋偃參

羞紅妝皓腕映連漪齊聲一氣歌豔辭桂舟蘭楫紛
 屢移佳人羅帶宜風吹

二

岸上有柳隰中有荷舟中女兒勝吳娥為君先唱綠
 水歌起攬長帶垂纖羅鴛鴦雙棲翡翠過下渚日暮
 多風波葉密花稀愁奈何

三

急歌太短緩歌長清風夕回素雲翔雙鳧飛起向橫
 塘荷花不言空斷腸明月宛轉流西方月中白露沾

衣裳紅顏青鬢安能常萬歲為樂莫相忘

獨漉篇

獨漉獨漉驅車折軸不畏折軸但畏車覆芄芄者藉
生彼中衢雖有蘭蕙當門則鉏同行竊金相顧道左
我實不知彼則畏我食荼知苦食梅知酸狐裘之敝
可以禦寒有虎斑斑伏于林下我欲射虎愧無勁弩
肅彼北風渡彼中流豈不懷憂與子同舟

白紵歌七首

齊紈越羅霜雪輝吳刀并剪為君裁鳴璫垂珮行相

催且步雲館升月臺珠纓列座瓊筵開秦箏慷慨趙

瑟哀含淒斂嘆

一作
笑

君莫猜

二

鳳樓十二連繡衢雕楹刻桷耀城隅朱檠絳蠟豔紅
渠金盤玉羞奉君需美人隔坐曳華裾主稱萬年為
歡娛上客翠蓋停踟蹰

三

千金買笑萬金買歌明珠白璧豈足多長眉窈窕揚
秀蛾輕身起舞垂纖羅悲絃急管鳴相和三星低戶

月沉波銀箭金壺奈夜何

四

吳娥白紵為舞衣，鏤花綴葉紛葳蕤。青春爛熳白日輝，輕帶一舉長袖施。皎如流霞隨風飛，游龍宛轉翔鵲迴。傾城絕代人共希。

五

手中色絲舊所治，青紅碧綠當自知。衆中不語心向誰，感君厚恩私念之。東流之水不西馳，泰山在前不可移。紅顏白首奚足辭。

六

北里搗鐘東鄰搥鼓，吳歆越吟邯鄲舞。恩義如山金如土，遺簪墮珥不復數。窮冬夜長樂未闌，流風迴雪滿楹前。不惜皎潔為君妍。

七

白玉瑣闥黃金堂，蘭煙蕙火薰象床。雕屏羅列組帷張，繁膏列炬舒華光。橫簫挾瑟步曲房，朱唇素齒發浩倡。願為比翼雲間翔。

苦熱行二首

火雲崢嶸連赤阪白日苦長不得晚庭前井乾生赭
煙炎埃晝起高塞天侯家陰洞帶流水紗帷白晝淒
風起美人冰盤薦朱李道上行人多渴死

二

晝眠苦多蠅夜眠苦多蚊炎霞熱霧蒸網緼四體拘
促何由伸仙人桂宮接蘭苑下望青松踏幽巘我欲
從之諒非遠塵世何堪遂仰偃

鳴雁行

鳴雁鳴斯其音嘹嘹江路遠遙念汝離漂鳴雁于飛

肅肅其羽遵彼脩渚實維汝所洞庭增波沙朔多風
何寧往來無卹爾躬飛斯鳴斯求蒲與稗無俾霰雪
及爾遊邁高山有石高木有枝我思我朋嗟哉可遺
行路難四首

牀有織綺篋有織素請君視綺還視素憐新不如莫
棄故罇中有酒盤有殮聽我為歌行路難衆中歡樂
多志氣豈知他人不得意白日有時不照地安得保
君常不棄

二

六街集 卷之五 三
天河熒熒西北轉織女牽牛不相見由來天上亦別
離何怪人間有悲怨世情磷薄惡衰賤駕車騎馬有
人羨少年不得君愛惜紅顏勝人亦何益

三

高樹鳥不集常有東西南北風君子衆所畏好惡不
合常相攻拔劍欲有適前有虎兇後虺蜮抵節徒歌
行路吟高飛未有橫天翼

四

我發行路歌諸君請勿譁嚴冬霜雪雖可畏三春草

木自榮華人生富貴各有時不勞辛苦更咨嗟百年
冉冉寧復多白日速如東流波眼中世事只如此生
前不樂將奈何

棗下何纂纂

種棗北墻下棗熟委路衢行人競取食居者守空株
憶昔棗初赤傾路且停車棗當今日盡誰能少踟躕
天命誠不易榮落互相渝功勳本積累傾奪在須臾
聆我棗下言貧賤可久娛

河水曲

河水何濺濺暮采河邊蘭君隨河水去我獨立河干

車遥遥二首

馬立車遥遥望望車塵滅但聞上車語不得下車別

二

寒鷄喔喔知夜半隣翁春梁婦炊飯僕夫聞鷄趣車起欲明未明行十里火輪飛出扶桑霞羲和騎龍鞭日車君看日亦無閑時我車安得長在家

隴頭流水歌三疊送劉遠夫行

我欲望長安隴坂高蔽天隴坂高可陟隴水鳴濺濺

二

盤盤上隴車斑斑下坂馬我非虎與兕使我行曠野

三

長安有高樓不見隴西州可憐隴頭水日夜東北流

下陵曲

上陵風以雨下陵月星露

一作上陵有風雨下陵有星露

不見西陵

宮但見松栢樹朝行西山曲暮至長安道長安車馬多風吹陵上草

直路行

直路難行直言難受邪徑捷足莠言悅口直言如矢
聞者畏憚如射曲巷鮮不折幹直路坦坦不可避難
大夫史魚死以尸諫汲黯抗言不冠不見輪扁之言
桓公是悟焦不避烹秦皇霽怒猛虎在前不為我言
虺蛇在後不為我告二世自悶遭害于宮號君怒御
枕塊道中不忍其憚寧忍其亂苟畏爾恥必視爾死
如藥弗潰其疾必遂如矢不直不能貫革小人惡直
君子是持神之聽之終獲其釐

海山謠

斷鰲立浪海水裂蜃魚食日日五色海中靈氣變莫
測白晝湏臾風雨黑彭祖天巫咸滅龍伯死精衛絕
山亦可搖水可塞

秋江詞

煙渺渺碧波遠白露晞翠莎晚泛綠漪蒹葭淺浦風
吹帽寒髮短美人立一作江中流暮雨帆檣江上舟
夕陽簾櫳江上樓舟中採蓮紅藕香樓前踏翠芳草
愁芳草愁西風起芙蓉花落秋水魚初肥酒正美江

白如練月如洗醉下煙波千萬里

瑤瑟怨

美人竹間亭虛簾空月華相思湘江曲淚竹生斑花
花開為誰好花落不復掃出戶見春風低頭怨芳草
坐彈五十絃起視江月殘愁絃不堪聽手澁金鴈寒
一彈正淒切再彈轉嗚咽三彈撥幽腸聲亂水絲結
西風吹芙蓉一夜落舊紅豈知瑤瑟音能消青鏡容

黃頭郎

黃頭郎爾母侮殿上天子憐府中丞相怒爾雖有銅

山運去銅如土黃頭郎爾母侮

黃鵠歌

請君勿誼譁奉君黃鵠歌黃鵠一飛去翱翔天之涯
我欲致此鳥雲中無網羅安得生羽翼從彼凌丹霞
山川遼以邈不歸當奈何

烏夜啼

啞啞烏啼宮井霜殘月半落明星光城頭吹笳已復
罷宮中擊鼓殊未央

竹枝詞

十二峯頭秋草荒冷煙寒月過瞿塘青楓江上孤舟
客不聽猿聲亦斷腸

采葛篇

野風吹葛葛逾好縮霧縈煙青嫋嫋谿迴水白雲石
蒼石根引蔓百尺長越婦腰鎌赤雙足褰裳行歌入
中谷朝日未出霧露寒花繁葉密採掇難年年積絲
作絺綌奉以服君君莫數君知衣葛好不知採葛苦
白日畏逢蛇月黑畏逢虎君不見吳王宮中細腰女
日向歌筵着白苧

霹靂引

石湫黝黝黑雲夕蛟龍夜起隨霹靂盤空殷地出絕
壁驟雨飄風怒相擊空中將將下矢石干戈萬馬俱
辟易飛鳥墮地委如積古檜長松盡遭劈吁嗟乎阿
香深山巨海胡弗往短域脩虺兼魍魎

刺促篇

刺促刺促井燎不續雖有塲苗室則靡粟羅雀務獲
不言其多見彼淵鱗或言其苛跣夫逐鹿坐者食肉
苟一需百百爾莫足譬彼乘車弗率坦野驅馳不已

或敗爾馬河有伏罟蛟龍去之相彼有明孰逢其災
前有鼓樂後有寇盜方言方笑不敢以告執鼠不力
或傷其手彼虎彼兕矧不以走有蓬其樹其腹之枵
豈不休息維顛在朝

處州別駕行

處之地山水迴處州別駕賢且才別駕來郵吏馳騎
連連鼓雷雷城門大開別駕來別駕來御駟馬雙麾
在前高蓋娜娜入有列戟出有負弩吁嗟別駕才且
武江之水去悠悠兩帆揚別駕舟處人來迎申人留

嗟別駕安以適彼安以去我

種瓠詞

種瓠東園內瓠葉從風翻綠蒂飄長帶素花密以繁
雖無百尺根枝蔓自纏綿雨露冒時澤陽暉被朝暄
竊比女蘿草附身托高垣綠畛齊結食豈貴充盤殮
願為連理杯長以奉君歡

雙燕篇

雙燕何翩翩飛去仍徊翔依依止畫閨繾綣鳴東廂
昔來屈陽節今去易寒涼祗恐秋風高海路多煙霜

雙飛入君戶雙栖在君梁被蒙君仁惠彈射不相防
養雛毛羽成送雛還故鄉雖無黃雀報歲願巢君堂

去婦詞

孀孀竹竿釣魴及鯉魴鯉可食竹竿何以子有錦衣
莫忘布襦子有旨酒莫忘糟糠賤妾嫁君所期偕老
紅顏難長倏已白首白首雖可出不念紅顏日

種麻篇

種麻冀滿丘種葵冀滿園孤生易搖悴獨立多憂患
當行思故旅當食思故歡先機失所豫臨事徒嗟歎

升蕭艾乃至鉏桂致傷蘭物理有相附疇能識其端
斷金俟同志抱玉難自宣交結良匪易君當圖未然

月食篇

仲夏月食月半缺仲冬月食食之既皇皇下民亦孔
之悸燁燁其魄有物薄之彼盈而微實度之宜今此
下民孰使告爾災嗟嗟亦悸孔哀有烈其風自伊天
阻雲旗載揚朦瞽奏鼓率彼下土訴于帝所訴于帝
所光復于天光復于天其明罔愆照臨爾下民

國士行

漆身為厲吞炭為啞更名入宮廁變形伏橋下雖不
褫讎魄猶得斬讐衣生有國士名死為壯士哀

誰謂河廣行

誰謂河廣濁不見泰山孟水之清可別媼與妍清濁
苟異小大安足言君子知之衆人皆茫然

下宮行

下宮兵來圍朔妻置兒袴中兒不啼一索不得當再
索孤兒那可活嗟杵臼爾為朔客我為友立孤誠難
死何有嗟程嬰女當徐死難當事爾強為難我為易

千金詐賣趙氏子真孤乃存杵臼死復趙社嬰刎頭
報死者

易水行

寒風夕吹易水波漸離擊筑荆卿歌白衣灑淚當祖
路日落登車去不顧秦王殿上開地圖舞陽色沮那
敢呼手持匕首摘銅柱事已不成空罵倨噫嗟嗟燕
丹寡謀當滅身光也自刎何足云惜哉枉殺樊將軍

君子有所思行

一字起十字止

猗君子有所思居高無民不如守卑衣錦負薪入市

見嗶神龍在洿淖反為魚鱉譏鳳凰不得地翻身避
群雞騏驥雖能千里逐鼠堂上不如狸丈夫秉性天
所定流俗是非何足移水中馬與陸地之魚曷謂失
所置能久須寧為地上特生之野草不能為茂樹負
巖墻而居

燕啣泥

君不見燕啣泥為巢哺雛常苦饑雛有羽翼各自去
安能久在梁上飛丈夫出處亦如此貧賤富貴皆人
為燕啣泥不慮哺雛勞但慮眾雛飛不高

養蠶詞

桑葉青蠶始生桑葉莫莫蠶白滿箔今年女兒道蠶
早晝夜照蠶恐蠶老浮萍生葉麥落花風簷繅絲鬪
鳴車君不見簇上蠶乾死老蠶成蛾又生子

嗟哉行

老烏能啄牛能觸嗟哉世人互傾覆自徹其藩盜入
屋同病者憐同憂者嘆梟子奪鳳眾雞不安何得同
類反相殘彼梁可逝窳可避禍福由人豈天意君不
見虎雖有爪鴻有翅

雙鴈篇

錢水部世恩在宦失偶日夕哀吟其友何景明為
作雙鴈篇寄之

雙鴈雲中來雍雍揚鳴音念子中路散一飛與一沉
冥冥江湖道思歸苦不早昔為並棲禽今為特飛鳥
飄沙戀故浦別流思故河奈何同溝水翻作異派波
鳥悲多苦音客悲多苦言絃爾孤桐琴操我雙鴈篇

莫羅燕

羅雀莫羅燕燕飛在高殿殿高且深誰得見主人垂

幕高殿中燕來徘徊不敢通揚花落燕出啄童子張
羅逐黃雀黃雀入羅燕入幕

牧犢行

黃牛遇虎南山下夜見白石心中怕牧童牧犢畏虎
欺拗弓邏之不敢離削竹為簇蒿為箭射虎恨不穿
虎皮嗟汝虎爾勿欺我犢我犢有日頭生角

城畧陽

扶風令城畧陽賊來畧陽令走藏扶風令為登城喚
抽刀誓眾眾不散三日抗城一日戰戰不利兮生縛

見見賊罵賊危不變畧陽城人盡為鬼畧陽令生扶
風死守臣上奏驚 天子君不見扶風令死封公卿
嗟爾略陽之令胡為生

潘節婦

二十君辭房六十妾在堂紅顏為婦白首孀昔日抱
女今已亡風火炎煙黑隣里相救失顏色未亡之人
安所從義不避火天返風噫嗟嗟妾雖有身君無子
身未化石心不死

高城行

高城截截山百堵白日樹旗夜懸鼓將軍戒嚴太守
武城下賊來城上設弩樓軍轉石城人負土噫嗟嗟
城完家可全城破家為虜傳與城中人但保城莫閉
戶

南山篇 并序

宏器為思親卷予為作詩文及今八年矣宏器得
貢將入京復以此冊求予詩遂為是篇

朝采南山白石盤盤風來吹葛葛葉幡幡豈無枝蔓
念我本根翹翹栗薪靡考誰藝緝緝葛絲考則靡服

大復集 卷之六 十一
篔簹澗魚在留麗麗昔用為殮今用為祭上陵折松
下坂折柳遥遥遊子勿以行以月不恒處日則有西
瞻彼日月思我父母

轅下駒

轅下駒鳴聲一何悲豈無萬里志弱躄安能施詰曲
羊腸坂纍纍大行谷車輪不行白日歿仰思玉山意
超忽君不見八駿日行萬里馳煙掠景誰能拘吁嗟
乎轅下駒

何大復先生集卷之六

何大復先生集卷之七

五世姪孫源洙字魯存
六世姪孫維基字培菴
七世姪孫輝少字誦芬
男八世姪孫永謙字遜齋 同校訂
重梓

五言古詩五十首

武陵以下使集

武陵一何長遼遠不可測高林多悲風慘澹日無色
黃熊啼我前白狐趾我側蛟螭蟠深淵下見奔雲黑
沙蒸水亦毒我僕饑且踣辭家怨踰秋適此萬里國
土風日以殊川域邈無極伏波有遺響吟餘轉悽惻

何因托橫吹一寫千載憶

桃川宮四首

神宮轟飛觀結構俯層邱上翳萬年樹下暎千尺流
仙蹤久已沒百代傳其由荒塗橫白雲寥寥安可求

二

谿谷多青氛朝暮不可知雞鳴洞中樹輕暎散華池
白石流丹液靈葩耀朱蕤誰能學丹術遂使塵網離

三

石洞無遺構空巖長松桂入深忽已陰升高稍知霽

山光晚多姿谷響秋轉厲緬懷避秦者一往成永逝

四

溪中何所有磊磊多白石紫參生其陽青松植其北
遠林商氣清絕巘夕光白何當蒞雲奏招我吹簫客

自武陵至沅陵道中雜詩十首

承明播宸渙西適蠻夷州艱哉武陵山古道何悠悠
狹谷不容憶水中無行舟仰探虎豹窟俯瞰蛟龍湫
徘徊遲吾馬中心懷懍憂脩程尚延亘我行何時休

二

群山何逶迤環峙如百城其上干青霄其下浮雲征
出沒千萬態倏忽殊陰晴撫茲豁心目頗慰羈旅情

三

亭午入大谷烈陽經中天樹木多鬱蒸石坼起焦煙
掘地飲我馬數尺不得泉僕夫告飢渴揮汗墮馬前
安得萬間厦坐使清風延

四

暮投界亭驛候吏迎我前息徒茂林側飲馬山下泉
落日四巖陰餘映高樹顛坐久吏人散濁醑聊自延

五

驅馬山上行山高何巍巍脩阪接飛翼百步仍九迴
俯視煙靄中衆山鬱何壘茫然望四海萬物亦已衰
昔我別京國朱華猶未希歲節忽復易何時當旋歸

六

大壑百餘尺流水浩湯湯我行路中斷欲渡無橋梁
誰為理舟楫石亂不可航改轍上危棧登茲千仞岡
臨深古有戒側足以徬徨

七

大復集 卷之七

叢薄被煙舉徑路紆且微秋風振喬柯綠葉漸以稀
日入群動息林深衆響歸君看棲枝鳥大小必相依

八

山深多樹木百里人民稀時有四五家茅茨隔山陂
沙田不可耕何以禦歲饑門前數畝園秬收蓬與藜
平明出汲澗薄暮始得炊童稚那敢出但畏逢虎羆
草黃納晚禾桑綠催官絲嗟爾遠方人辛苦誰具知

九

山勢行轉促連峯相貫輸窈然林莽中乃復得坦途

青壁結煙靄縹緲凌虛無層阿秀嘉禾下覆清水渠
夙志好幽僻覽茲耳目娛公車雖少延顧盼忽已踰
安得鼓清瑟日坐山之隅

十

谷轉岡漸平策駕循陂陀遙望辰陽城枕山帶長河
飛甍若鱗次居人亦何多按節駐江館登眺崇山阿
南衢聞夜絃北里揚朝歌誰云接夷域文物殊中華

懷化驛芭蕉

芄芄芭蕉葉植此園中央繁綠布重幄層陰蓋高堂

大復集 卷之七
孟夏日初赫蕭森蔽炎光衆賓御華館四座借虛涼
四序互更謝南陸回朱陽窮秋多風雨寒冬多雪霜
危叢旦夕茂綠葉日夜黃本無松柏固安用誇其長
徘徊視草莽零落同一傷

花崖梧桐

桐生何猗猗其葉何油油白雲蔭崇阿朝日照高邱
感此雨露滋愧彼蔓草儔鳳凰久不至琴瑟誰可求
吾將緼繁絃庶以宣我憂

清平令

清平縣之令不識何為者庭前長野桑庭後長山櫛
猛虎上我城青狻啼我舍昨日出城去騎馬到部下
部民道遮之持刀殺其馬入門顧妻子所居無完瓦
秋風吹樹木白日落原野永夜空城中哀哀淚如瀉

平越

清晨發平越霧暗山益密僕夫各相戒路遠恐迷失
薄午游氣清參差衆峯出雞鳴谿谷中始見崖上日
雲葉分杳冥高原被華實秋風起叢林興感乃非一
悠悠遠行遊歷險難具述

新添

朝登七盤坡復下九折坂長風飄落日杳杳前山晚
征夫行取薪夜入礪中飯仰視飛鳥還載觀浮雲卷
還顧望鄉邑日與親愛遠公家尚有程安能速言返

平埧城南村三首

朝出城南村策馬入荆杞村中八九家烟火自成里
兒童候晨光稍稍荆扉啓四鄰務收穫時復披草語
昵昵何所云但言好禾黍

二

秋陰結林霏細雨洒茅室牧放止近郊牛羊不相失
廣園散花林平疇藹風日長幼不出門咸知戀儔匹
喧喧車馬中徒為慕高秩懸輿當何時可使志願畢

三

沉沉古陂水日暮寒更綠隔陂見居人蘿蔓纏草屋
摘禾留客飯採薪蒺秋木童稚持竹竿雨中放雞鶩
區區化外國猶得覩淳樸

普定

鼓絕掩山城空堂思超忽孤燈明夕帷悄悄涼風蒺

落葉何飄蕭飛螢互明沒客牕臨古寺坐待微鐘歇
城南婦行

城南有寡婦見客泣數行自言良家女少小藏閨房
青春嬌素手白日照紅粧父母偏見憐嫁我不出鄉
前年彌魯亂腥穢入我堂弟兄各戰死親戚俱陣亡
嗟哉華豔質忍耻罹克強憂愁雲髮變辛苦朱顏傷
昨聞故夫在息消通兩方百金贖我身三年歸舊疆
歸來門巷異人少蓬蒿長轉盼夫亦死兒女空在傷
薄田無耕犢寒臘無完裳人生固有命妾獨遭此殃

况復官軍至燒焚廬井荒主將貪賄賂百死不一償
朝廷自有法出師亦有名妾身何足道無乃乖天常

平夷二首

滇南八月中綠林何萋萋居人亦相輾數里聞鳴雞
路轉無詰曲山行少攀躋回瞻貴陽道咫尺蹊壑迷

二

夜宿平夷館風悲氣始淒月光皎東壁白露寒蟬啼
憑高視中原但覺衆星低長路心益壯浩歌天之西

涪萬

孟冬氣始肅葉落北風涼寒水斂溝壑餘輝照橋梁
方舟下涪萬所歷非一疆崇朝越千里川塗渺蒼蒼
浮雲帶城邑壯麗透且長况多古人迹覽之心慨慷
登遊豈不美滯淫非我鄉

泊雲陽江頭玩月

扁舟泊沙岸皓月出翠嶺開牕鑒清輝照我孤燭冷
高林散疎光遠渚接餘景縱橫銀漢迴三五玉繩耿
弦望幾更易客行尚殊境佳期遡山岳端坐令人省

涿鹿道中 以下家集

高城鬱莽蒼永路多荆棘日氣夕以陰遊氛浩無極
城邊古時邱宿草蔓于域樹木何蕭蕭狐狸鳴其側
訪古思軒轅欽崧何由陟伊昔奮龍戰明明庶邦式
神馭飄鼎湖烏號緜玄德遺踪邁荒野盛烈存茲國
誰云戡亂功不俟干戈力風雲變俄頃明晦古難測
薄暮窮林中怒焉長太息

渡白溝

春行傷旅思單車悵蹉跎晨眺黃金臺夕渡白溝河
求賢不可見血戰竟如何落日古原下悲風入浩歌

九後集
卷之十
叢臺

邯鄲多俠士趙地產名娼日夕高臺上歡宴殊未央
黃金飾舞榭白壁綴歌梁安見千年後空令春草長
五平五仄體

秋原何蕭蕭耳目去雜葺枯荷猶穿塘苦瓠尚抱隴
寒風吹空林落日照古冢徘徊觀陳蹤露下髮忽竦
迎霜降

烈風揚雲旗鼓角悲廣路庭前玉樹枝昨夜微霜度
幽人躡葛屨出戶履寒素胡當戒堅冰及此歲將暮

冬雨率然有二十韻

北風吹零雨冬熱雪不作二儀黯澹交百川莽迴薄
沙霾翳白晝遠望何由豁六龍墮青冥萬象淪玄朔
羲和扶日行紆轡竟焉託神媧補天裂鍊石恐遺落
雨伯誰為誅雲師爾何惡前者十月交震雷轟城郭
岸條俱含柔園卉亂吐萼農家忍朝饑歲暮食籬雀
豈無數畝禾狼籍委秋雹徵求皮肉盡枯骨待剝
妻孥在眼前四季不得樂胡因見陽春所慮轉溝壑
閒居值泥淖展矚翻蕭索雖無長者轍自閉寒士閣

長陰下俯麓暝色起孤岳喧啾後栖鴉悵望暮歸鶴
世途紛轉蓬生計倚叢藿永懷昔人駕冥心付寥廓

發京邑四首

弱冠遊 皇邑抽翰預時髦出入承明地四海皆同
袍浮歲奄七徂徇名虛所遭夙痾糾織質褊性憚形
勞駕言返初服行矣遂林臯轉蓬戀本根羈鳥思故
巢自顧無脩翼安能久遊遨

二

驅車出郊門杖策遵古行返顧望城闕引領內懷傷

崇京槩霄漢逶迤一何長雙觀臨馳道群宮儼相當
迅飈激櫺牖游雲起縱橫漢道值全盛纓綉爛輝光
側觀青雲士鳴珮倏來翔梁生何慷慨遼遼悲未央

三

親交遠集送斂策西山陰前瞻太行道却顧上苑林
青陽藹廢墟春氣感鳴禽所遇豈殊故即事自成今

一作所遇豈殊
時即目成古今

平時等榮樂一旦異浮沉昔者同袍

友邈若辰與參山海去靡極年運日相尋倉卒盃酒

間寧不傷離襟

一作惻惻
傷離心

行邁越長甸歷歷懷苦辛
嶇嶇陟丘隴髣髴望郊閨
墟里接雞犬井邑無閒人
暄陽入廣陌煦煦周原新
百城豈不美風土非我隣
遥遥盼鄉域言念故所親
代越各有性所願還其真
胡為去桑梓鬱鬱冒風塵

渡河

夙征肇延津明晨臨大河
洪源下積石砥柱屹嵯峨
渺渺梁宋區汗湯縱經過
自非陵與岸於安障其波
揚帆赴中流四顧莽無涯
崇雲徂廣澤迅風夕吹沙

積陰不可測魚龍偃相加
前無千尺梁一葦胡足誇
人生寡恒居奚異波上槎
豈無舟楫志漂泊當奈何

許下

伊昔炎漢季西京方遘患
宮室燒燔盡乘輿播草間
劫遷留茲域荆棘滿頽垣
橫流一以濫大厦寧復完
豺虎互馳噬鴟鴞厲飛翻
日月屢薄食風雲變無端
嗟哉衆君子杖策起周旋
荀公誠偉士弘思濟其艱
陳琳自南至王粲亦西還
從戎藉雄辯騰步有榮觀
良蹇豈同御鳳鶩不共餐
功名安足為明義乃高賢

還至別業四首

雞鳴高樹杪，狗吠墟里間。
 家人望車徒，遠客造門端。
 入門問所親，上堂叙悲歡。
 行人暮飢渴，一作苦飢秉燭具盤餐。
 明月照西戶，三星爛中天。
 出門踐野草，白露倏已溥。
 十年苦行役，茲夕方來旋。
 寧知非夢寐，忽忽心未安。

二

詰晨親友至，筐榼携所需。
 各言平生歡，念子久離居。
 綢繆語未畢，展席臨前除。
 園榮亦已抽，况有盤中魚。

三

人情倦懷土，富貴豈常於。
 無為泥形迹，所願恒相俱。
 依依入鄉閭，慘惻歷故疆。
 行邁踰幾時，所見忽以更。
 成人匪故識，耆齒日凋喪。
 平生所同歡，轉盼殊存亡。
 羈魂邈遐域，旅柩歸中堂。
 人命不相待，奄忽如朝霜。
 撫事感今昔，喟然熱衷腸。

四

弭駕及春暮，比屋事耘耕。
 時物展遐矚，契我遺俗情。
 故林茂以密，敝廬亦將成。
 芳蘭冒紫葳，園柳尚垂榮。

澤葵蔓廢井瓜田依故城策杖衡門下仰偃遂平生
 所願在怡親餘者奚足營世情惡衰歇天道遞虧盈
 駟馬豈不貴翻覆坐相傾

七夕二首

逝節忽不處佳夕復我臨神飈汎光蕙渥露沾華林
 緬彼牛女會茲端竟難謀形影惜相望胡由接徽音
 飄飄翠龍駕髣髴青瑤簪長河坐移轉素波斂西沉
 靈彩歛以晦游雲起層陰同歡戀膠漆異處悲辰參
 翹思慕遠匹感此涕流衿

二

舉俗慕良旦好尚各有趨高樓曝紈綺貧女無繒襦
 移時曜靈沒素月復已舒群居侈歡宴長坐獨愁吁
 愁吁亦何為同裊與我殊春徂秋未返膏沐誰為娛
 仰視河漢女相違復來俱要知比翼乖各阻天一隅
 乖離有重覲母使寸心渝

水曲納涼

乘月玩清夜漱流滌煩痾竹栢夾脩水微風揚澤荷
 苔陰皓露溽素鱗躍于波柔條紛斂結勁葉亦墮柯

優游蕩情志俯仰丘中阿雖無朋儕和興言自成歌
娛樂當及時千秋豈復多

雜詩二首

西陸移脩晷素節多寒陰端居屏營慮淒氣慘人心
浮颺委時卉零露傷青林仰見孤雌翔玄鳥無遺音
蟋蟀何愁苦終夜長哀吟感物興慨嘆憂思孰能任

二

馳輝在西山返景流東隅群欣被光灼何能待須臾
重陰肅萬物樹木日夜踈叢蕙一作蘭植幽闥含榮耀

前除佳人眇雲端何由致區區常恐霜霰至委棄不
我需

王君青雲姿志豈屑丘壑名家出杜鄩少日遊宛洛
奮身匹文鶴戢羽巢鸞閣興文燭雕龍揮翰凌玄鶴
雅志在四海隨時偃經略馳情繼謝眺日晏吟紅藥
康脩撰海
矯矯龍頭士騰躍在明時群遊慕豪放棲志固有期
赤驥鳴烟霄不受黃金羈揮毫御清謙浩思隨風飛
鐙前激高侶顧盼孰與希究古摘遺編頗好班馬辭
良史久無稱斯文當在茲

何編脩塘

中州產名俊河內天下士平生飽藜藿學道歷壯齒
至樸斂華蔚微文陋雕綺守淵安可窺馳辯詎能止
洞悟超先幾微言析玄理曲高難為和行獨寡知己
古轍多蓁蕪非君誰予起

李戶部夢陽

李子振大雅超駕百世前著書薄子雲作賦追屈原
新章益偉麗一一鸞鳳騫華星錯秋空燭火難為然
摘文固無匹投義罕比肩抗志冀陳力危言獲罪愆
握瑜不得售寶棄誰為憐仲舒貶膠西賈生去南遷

古來有遺憤非君獨哀嘆

邊太常貢

世士多戚促器識寡蕭散太常何瑰瑋坦然破崖岸
祥煙拂瑤壇瑞日轉華觀出入諧鶴鸞頡頏在霄漢
芳詞灑清風藻思興文瀾陽春誠獨步清廟獨徒一作
三嘆金奏響不虧玉樹開逾燦閑居檢遺篇啟篋得

爾一作玩

王職方尚綱

職方吾益友契誼鮮與同少齡負竒氣萬里飄雲鴻

手中握靈芝高操厲孤桐讀書邁左思識字過揚雄
為辭多所述結藻揚華風寸心素相許撫志慚微躬

十三夜對月

閒居愛明月良節復與俱金魄麗秋闈皓彩揚雲衢
澄空斂霜烟清飈蕩中區徘徊廣庭內改席臨方除
顧景怵哀慮興心念居諸天道逝消長戒之在須臾
懷謙可久安盛滿豈恒居孰云質靡盈所貴光不渝

十四夜同清溪子對月

林塘枉佳客待月欣舉觴今夕勝昨夕已見生東方

離離絳霄側冉冉素雲揚踰時灑氣澈懸耀天中央
仰視渺難即忽覓一作在我傷清池含微波左右泄
流光月行固當望人會何能常與子各鄉域邂逅臨
此堂良時不屢值明月安可忘醉歌吞永夕和我窈
窕章

十五夜高鐵溪同沈清溪趙雪舟馬百愚過敝

居對月

端居撫盛節眷茲金素中上客弭飛蓋惠然慰幽衷
圓景舒東隅忽復周層空重輪爛五色繽紛結文虹

流輝接瑤席絳氣鬱以葱眾賓侈佳玩聯篇挹華風
情好在明月安問膳靡豐弦望有恒度明陰變無窮
人生非比翼豈得常相同所願御此觴聊以娛夜終

十六夜月

日夕城烟斂列宿出復多開軒望明月展席流素波
圓輝雖少虧猶能遍天涯單居一作不為樂念遠徒
咨嗟美人越崇京高樓結綺霞浮雲暮長征何由覩
光華迅飈萬里至霜霧日以加坐憂桂枝歇委落同
泥沙清輝苟相照豈慮天路何一作

十七夜月二首

夕望月已減雲飈蕩其側月減不足憂盈虛本相值
胡為蔽氛霾坐使清光匿踟躕久延待慘景鬱無色
燈前理鳴絃瑤徽為誰拭思我平生友道遠不可即
素書委篋笥安得雲中翼滄海多波濤長陰浩難測
何當廣餘輝一照萬里域

二

更深月復明揚秀青雲端浮飈倏以寐長川靜波瀾
徘徊廣除下白露棲崇蘭仰見城西樓迴光照文軒

樓中織綺女延頸獨哀嘆哀嘆未終已素河橫西山
逝魄不長望玉貌寧久妍君母吝光惠使我芳歲闌

擣衣

涼飈吹閨闈夕露淒錦衾言念無衣客歲暮芳寒侵
皓腕約長袖雅步飾鳴金寒機裂霜素繁杵叩清砧
哀音緣雲蕨斷響隨風沉顧影惜流月仰盼悲橫參
路長魂屢徂夜久力不任君子萬里身賤妾萬里心
燈前擇妙匹運思一何深裁以金剪刀縫以素絲鍼
願為合歡帶得傷君衣襟

悼往

行雲不歸山逝水難重迴與子一為別流光倏如推
形神往無存夢想弗克諧孤冢日荒穢幽泉翳窮埃
重扃一以閉千秋寧復開時至展遐沉傾醑澆黃菜
還思平生居歲久生夕苔寒風吹空閨彷彿鳴玉哀
人生重恩義况茲比翼乖何能春新歡棄擲故所懷

贈望之五首

遙遙京洛客承命蒞華輶朝辭冀州野夕泛黃河流
雙旆翔汝側駟馬登故丘故丘鬱以長岡隴茂松楸

車徒耀城郭親戚迎道周丈夫事四方州閭寧久留
王程在湏臾顧念但懷愁前有盈觴酒為我且綢繆

二

清晨送遠人弭駕北城隈北城一何脩前臨古時臺
俯仰故鄉域一如平生懷季冬嚴風發積雪皓皚皚
念子徂遠路鬱結不能開中林寒卉冱樹木何摧頽
安得春華敷採掇以相貽

三

驅車策良駟北上遵太行升高睇崇京宮觀鬱一作

六後集 卷之八
相望前瞻碣石端俯見東海疆壯觀局宇內高志何
激昂孤鴻暮一作南翥奮翅起隨陽黃鵠遊四海胡
為悲一作戀故鄉何能有羽翼從子俱翱翔

四

昔子當此徂值子復南旋相違踰幾時世事倏推遷
訪舊半存亡誰能不摧顏浮雲歲暮征餘曜銜西山
居人念川塗行子戀鄉關平生雙龍劍乘別何時還
志士重明德窮達奚足嘆願君勗令名相期在盛年

五

人生寓大塊聚散如飈塵昔為同調好今為異鄉人
孤獸鳴索偶翔鳥求其群戀故各有慕何況骨肉親
子當被華紱結束事明君我當守蓬室聊甘賤與貧
去住各努力良覲會有因

除夜二首

今夕復何夕偃仰茲歲周懸膏耀室隅中饋進芳饌
雖無車馬客親戚自相酬遊魚安深淵翔鳥止故丘
所歡在桑梓餘者何復求逝節不重至來者難預謀
長跪奉此爵延年樂千秋

二

閒居知時節習靜觀卷舒日月無恒處念往寡歡娛
歲徂浮雲陰積雪皓中衢豫章產江濱孤蕙敷山隅
芳烈雖靡虧遐遠寧見需所願勗明德庶以酬居諸

豔曲八首

御溝連上苑大道接平沙紫陌三千騎青樓十萬家
城中楊柳樹風起暮飛花

二

日出洛城裡歌鐘起四隣朝遊桃李蹊暮踏車馬塵

遊絲罥白日冉冉愁陽春

三

秦氏字羅敷馮家名子都妝成臨勸酒曲罷坐當鑪
白馬金吾子青絲提玉壺

四

明姿稱二八生長紫羅帷對客舞垂手邀人看畫眉
今朝仲春日照影臨芳池

五

粲粲東城子盈盈南陌姝自矜夫壻貴翻笑使君愚

日暮採桑去空迴五馬車

六

翩翩五陵兒藉綺冠華簪常懷雙寶劍詎惜千黃金
馳馬章臺下紅塵不可尋

七

蘭燈列滿座繁炬灼朱光富貴傾南國佳人出北方
畫堂翡翠帳夜夜鬱金香

八

高臺

一作樓

臨萬戶朱構耀城隈共藉鴛鴦綺雙持鸚

鵝杯春風樓下度一夜百花開

擬古詩十八首

冉冉歲逾邁念君長別離別離在萬里道遠行不歸
鷦鷯慕儔匹鸞鳥東西飛恩晨雙羽翼奮起凌天涯
向風長哀吟欲舉中徘徊川途浩無軌霜一作雨雪愴
以悲願因駐馳景得覲君光儀

二

婉孌城東姝懷春一何早朝遊採桑陌暮止垂楊道
自矜全盛時復恃顏色好玉貌隨年化安得不枯稿

昔為園中英今為路傷草路傷多車馬採掇難自保

三

名都有高樓上入青雲端脩城延曲隅阿閣交重欄

佳人理清曲當戶橫朱絃揚音綵一作丹霞裏令顏誰

不觀賓客會四座絲竹哀且繁日中車馬至薄暮皆

言還聽曲各言好知音良獨難誰為同心人並起乘

雙鸞

四

壘壘北邙山松柏何脩脩松柏有時摧人命安可留

朝為華屋客暮沒歸山丘洛中多豪貴藹藹皆王侯

高臺臨九衢上有百尺樓宅第儼相望軒車絡如流

存亡不預保富貴安所求不如邀我友乘馬被輕裘

遨遊百年內永以忘戚憂

五

藹藹東園內綠林萋以繁車馬自成徑桃李終無言

昔日東陵侯種瓜青門前既貴亦反賤變化更無端

俗夫寡恒態志士多苦顏豈不策高路高路遠且艱

良無萬里風孤翼誰當援

六

朝日照中庭杲杲春載陽東風吹綠草蝴蝶雙飛揚
歲華坐婉婉白露憊以傷予美不在茲所懷浩難忘
豈無芳桂枝含香誰為明

七

淒淒仲秋日百卉腓以殘涼風入階樹零露摧庭蘭
明月皎東壁昆虫鳴草間孤鴻暮安適哀音揚雲端
言眷平生友振翮起一作蕩孤騫遺我若逝波望子如
高山托忱在終始蓄久諒逾宣寸心不可移磐石誰

謂堅

八

鬱鬱山上松高枝布天涯上有女蘿草纏綿誓不移
葛生蒙於楚浮萍寄清池貴賤雖殊途附託各有宜
伊昔侍君子朝夕奉恩私馳心在皓首何意中睽離
窮年守房室常恐踰良時思君如日月所異光不遺

九

汎汎東流河嫋嫋河上柳春風暮飄搖花飛不相守
柔條欲攀贈何堪入君手惟有南山桐可以遺我友

十

圓如天上月光輝尚當缺與君非一身安能不乖別
關山日悠遠舉步難可越君如雙車輪妾心如車轍
相隨萬里去繞繞何時絕

十一

清晨秣駑馬整駕遵路衢遲徊覽故物憐惻心以紆
昔時千室邑今為百年墟郭郭蔽枌櫓狐兔翔城隅
人生寓大塊飄泊寡恒居諒無金石壽終與草木俱
一身不自恤安用顧其餘營營慕富貴辛苦誠為愚

十二

長安多豪俠白馬一何驕金鞍競絡繹寶劍相招邀
招邀狹斜道青樓鬱岌樓中妖豔女輕綺揚飄颻
皓齒激清倡逸響千層霄浮雲散城邑白日隨驚飈
熒熒桃李顏華早仍先凋結交苟弗宜誰謂能久要

十三

人生百年內胡為形所役登高覽九原但見松與柏
徘徊故里間念我平生戚斗酒相存問度阡復逾陌
上堂展殷勤華燈永今夕何必傾庶飭濁醑聊與適

朱顏難可常鬚髮會當白徧觀四海人誰為不死客
 良時弗為歡衰暮歎何益死者長不作生者長不息
 日月更相送萬古安所極素絲有蒼黃岐路多南北
 在家常相問出門安可測落木歸本根飛鳥戢羽翼
 客遊在萬里終當還故域

十四

朝宴高堂上賓友相追遊厨人進豐膳妙妓揚清謳
 處世無百齡為樂苦不周多財為患害駟馬招愆尤
 安如王子喬高舉凌九州

十五

歲暮寒風至蟋蟀夜鳴悲高樓有思婦嘆息不自怡
 良人行未返孤妾守空閨衾裯卷不一作寢羅帷誰
 為施君如東流水妾如西馳暉形勢不相及彼此何
 由諧結髮重自念携手期同歸秋華殞故林尚復揚
 光輝顧茲各弩力毋忘榮盛時

十六

迢迢孟冬夜悲風鳴北林嚴霜被野草宛轉時欲沉
 佳人久隔越曠若辰與參方舟不利涉欲往江湖深

客從南方至遺我綠綺琴願因雲中翼寄子瑤華音
膠漆不為固金石安足謀明義苟不虧歿齒當一心

十七

青鳥來北方徘徊朝南翔美人傳書至開緘爛生光
貽我機中錦宛轉成文章上織比目魚下織雙鴛鴦
物厚意不薄感激獨一作心一作徬徨裁為衾與裯置在黃
金牀君子不為御三歲聞馨香一心奉光惠常恐君
遺忘

十八

繁霜降秋夜膏火寒無光淒風舉帷幄素月流中房
客行在殊境一作君子獨處誰與將仰視天上星羅
列皆成行牛女獨何辜熒熒守河梁嗟無臨風翼欲
去不得翔引領長太息泗涕徒沾裳

魯連

仲連初歷國排難能解紛飛書下燕將立談却秦軍
不受萬戶侯長揖干乘君始稱天下士終為海上民

張良

子房號人傑像貌非魁偉報韓志已成翊漢功亦美

出竒掉三寸決勝在千里一遇黃石公還從赤松子
望郭西諸峰有懷昔隱兼蒞鄙志

游龍戢淵鱗翔鷲振雲翮潛姿媚幽深遐羽忌拘迫
頃來稅塵銜秉性嗜探歷連山秀我里幸茲睠昕夕
橫天巖巒疊映日蒼翠積涉波緬洄泐攀岑若咫尺
流目施遠垆馮悰異孤石嘉遯懷伊人俯仰慨今昔
霞構象丹崖烟蘿裊青壁秦本作丹崖象霞
構青蘿總烟壁傾耳谷
中音希蹤雲外迹興性一作感彌深即景無與適豈
徒藉虛觀終然契冥寂

遊西山二首

晨登山上海暮望河上道飄風塞埃塵積雨浩行潦
山人苦相留此道何擾擾虎狼夾路啼鴻鵠逝不早
石泉聊足飲糲飯亦可飽引乃平生親綢繆叙中抱
行遊白雲林倘遇瑤華草携手托相贈歲寒永為好

二

勝地不可多良遊豈在屢茲山秀靈域曠望契心許
峇嶷碧巖際縹緲青蓮宇鳴泉瀉丹壁白沙亘迴渚
眺心佇冥寂况有塵外侶吾當與爾曹翩翩接高舉

立春日作二首

藹藹春候至天氣和且清端居撫流化允愜靜者情
浮陽起叢壑流烟散孤城岸條發潛穎園卉含初榮
馮襟曠明霽覽物紆游行目悅雙飛雉耳感孤鳴鷺
形運自相代神理誰為名往規與時逝來慮隨年并
心存漢陰灌躬數南陽耕疏還念知止莊論持達生
自非秉昭曠能不嬰世營

二

鳥鳴知天曙冰泮知天和寒崖變吹律陽渚發鳴葭

溫風戒旦至淞氣應時加申矚暨昏旦馳情赴幽遐
連峯睇初景木杪眺孤霞陰雪被高岑暄波瀉平沙
辨候氣有異觸物理無涯撫已寡朋與懷侶獨長嗟
徒攀春岸條未采中林華情愜賞不遺心曠迹自賒
允矣敦夙游不愧在澗歌

田園雜詩二首

習宦非我長官久計轉拙遭斥還田廬獲與初念協
樹藝良有期農事固堪悅飄飄綠原風晶晶明川月
披襟恣吾適既夏不知熱回思行役日寒暑靡得輟

疎懶古雖鄙任性亦可率膏疇矧豐蔚積潦復淒冽
白日皎在茲停雲靜如結為謝二三子努力慰衰劣

二

去官今七暑漸與農務親隨宜諳土性言話群野人
時或遡微風行歌響空榛先民邈何攀慨焉傷我神
慨傷適誰知所有三二賓文論日往來炯炯高義申
炎雨回衆壑涼颼起脩畛兀然林木下日入忘歸輪
玄蟬夕益聒去鳥一何頻野行畏多露無使侵衣巾
何大復先生集卷之八

